

**共同經課-1 撒母耳記下七章一節～十一節，十六節**

1 當王 tiàm tī 厝內，耶和華也已經 hō伊脫離四圍 ê 對敵，得 tiòh 安靜 ê 時， 2 王 kā 先知 Ná-tan 講，看 ah，我 tiàm tī 柏香柴 ê 厝內，總是上帝 ê 櫃 tiàm tī 帳籬內。 3 Ná-tan 對王講，見若你 ê 心所想 ê，thang 去做；因為耶和華 kap 你 tī-teh。 4 Hit 暝耶和華 ê 話臨到 Ná-tan 講， 5 你去 kā 我 ê 奴僕大衛講，耶和華 án-ni 講，你 beh 起厝 hō我 khiā 起 mah？ 6 Tùi 我 chhoā 以色列人出埃及 ê 日到今 á 日，我 bē-bat tiàm tī 厝裡，常常行 tī 布棚 kap 會幕。 7 見我 kap 以色列人所行到 ê 所在，kiám bat 對以色列一支派 ê 士師，就是我命令照顧我 ê 百姓以色列 ê，講，Lín 啥事無 kā 我起柏香柴 ê 厝 ah？ 8 Taⁿ 你 tiòh kā 我 ê 奴僕大衛講，萬軍 ê 耶和華 án-ni 講，我 tùi 羊寮中，你 teh thàn 羊群，揀你，做我 ê 百姓以色列 ê 君王。 9 你無論去 toh 落，我常常 kap 你 tī-teh，tī 你 ê 面前剪除你一切 ê 對敵。我的確 hō你得 tiòh 大名，親像世上 hiah-ê 偉人 ê 大名一樣。 10 我 beh 為 tiòh 我 ê 百姓以色列定 tiòh 一個所在，栽培 in，hō in tiàm tī 家己 ê 所在，無 koh 遷徙，兇惡 ê 類無親像早前攪擾 in， 11 也無親像對我命令士師管理我 ê 百姓以色列 ê 日；我 beh hō你脫離一切 ê 對敵，得 tiòh 安靜。Koh 耶和華 kā 你講，耶和華 beh kā 你建立家。16 你 ê 家 kap 你 ê 國，beh 永遠建立 tī 你 ê 面前；你 ê 國位也 beh 堅固到永遠。

**共同經課-2 路加福音一章四十七節～五十五節**

47 我 ê 神因為救我 ê 上帝來歡喜。48 因為伊看顧奴婢 ê 卑微； Tùi taⁿ 以後萬世代 beh 講我有福氣。49 因為 hit-ê 有權能 ê 為 tiòh 我做大 ê tāi-chì，伊 ê 名是聖。50 敬畏伊 ê 人伊憐憫 in，到代代。51 伊 bat 用伊 ê 手出氣力，心志驕傲 ê 人伊有趕散 in。52 有權能 ê 人，伊 lut in ê 位，卑微 ê 人，伊升 in 做高。53 Iau ê 人伊用好物 hō in 食到飽，富 ê 人，伊 hō in 空空 tò 去。54 伊扶助伊 ê 奴僕以色列，來記念憐憫，55(照伊對咱 ê 祖所講 ê 話)，來施落 hō亞伯拉罕 kap 伊 ê 後裔到永世代。

**共同經課-3 羅馬書十六章二十五～二十七節**

25 上帝會堅固 lín 照我 ê 福音，kap 所宣傳耶穌基督 ê 事，也照永世代所隱密奧妙 ê 闡明，26 chit-ê 奧妙 chit-tiāp 有著現，也 tùi 先知 ê 冊，照永遠上帝 ê 命令來指示萬邦，hō in tùi 信來順 thàn；27 願榮光 tùi 耶穌基督歸 tī 獨一有智慧 ê 上帝，代代無 soah。À-bēng。

**共同經課-4 路加福音一章二十六～三十八節**

26 到六月日天使 Ka-pek-liát 奉上帝所差到加利利一個城，名叫拿撒勒， 27 就近一個在室女，是已經配定 tiòh hō大衛家 ê 一人，名叫約瑟；chit-ê 在室女名叫馬利亞。 28 天使入去對伊講，得 tiòh 大恩 ê 人 ah，平安；主 kap 你 tī-teh。 29 馬利亞不止 gông-ngiāh 伊 ê 話，想 chit-ê 請安是甚麼意思。 30 天使 kā 伊講，馬利亞 ah，莫得驚，因為你得 tiòh 上帝 ê 恩典。 31 Taⁿ 你 beh 懷孕生 kiáⁿ，tiòh kā 伊號名叫耶穌。 32 伊 beh 做大，稱做至高 ê ê Kiáⁿ；主上帝 beh 用伊 ê 祖大衛 ê 位 hō伊。 33 伊 beh 做王 tī 雅各 ê 家到代代，伊 ê 國也無窮盡。 34 馬利亞 tùi 天使講，我 bē 有嫁人，怎樣 beh 有 chit-ê 事？ 35 天使應伊講，聖神 beh 臨到你，至高 ê ê 權能 beh 致蔭你；所以對你生 ê beh 稱做聖，做上帝 ê Kiáⁿ。 36 Koh 你 ê 親戚以利沙白已經老，也懷孕；平素稱做 boē 懷孕 ê，taⁿ 有身六月日 lah； 37 因為上帝所講 ê 話，無一句無力。 38 馬利亞講，我是主 ê 奴婢；願照理 ê 話應驗 tī 我。天使就離開伊去。